

# Plein motivaziun malgrad igl impediment

Silvio Derungs muossa ch'igl ei pusseivel da far in emprendissadi mercantil era senza vesida

DA HANS HUONDER / ANR

■ Il di dils 9 da schaner 2008 resta a Silvio Derungs da Dardin en memoria per sia entira veta. Sin viadi cun auto da fatschenta ha el piars la vesida in mument sin l'auter. Da quei eveniment ha el denton buca laschau stermentar ed ha organisau sia veta da niev. Dapresent absolve el la scola mercantila a Glion. «Negin sa declarar daco ch'jeu sundel vegnius tschocs. Igl emprem vesevel jeu aunc dus per-tschien, pli tard insumma nuot. Ils miedis han dau ina schanza, oz ein els denton dil meini ch'jeu vegni mai a veser pli. Jeu mez sundel denton ferma-mein perschadius che quei vegn puppei ad esser il cass in mument», di Silvio Derungs (28) ch'ei maridau dacuort e che luvrava avon quei eveniment sco tschentaplantschius. El ei vegnius operaus pliras gadas. Tuttas intervenziuns medicinalas han denton gidau nuot: «A mi resta nuot auter che da spitgar e sperar sin in retuorn dalla vesida.» Il tgaun Luna – in bellezza labrador ner – accompogna el en siu mintgadi professiunal. Dapresent absolve Silvio Derungs numnadamein la scola mercantila, il praticum sa el frequentar tier l'assicuranza da malsaus Vita Surselva a Glion. Cheu ei vegniu endriz-zau per el in plaz da lavur.

## Midada radicala

La sperdita dalla vesida ha dau ina midada radicala ella veta da Silvio Derungs. «Igl ei secapescha en emprema lingia ina damonda dalla tenuta, co ins emprova da vegnir a frida cun ina tala situaziun. Jeu sestentel da far il meglier ord la caussa.» Silvio Derungs semova oz cun ils mieds da traffic public e s'ingrescha da niev el mintgadi profes-



Daniela Seiler ei engaschada tier Procap Grischun sco responsabla per la regiun dalla Surselva.

siunal. L'entschatta hagi el bein era giu difficultads cun la situaziun nova, ussa mondi tut empau pli tgunsch. Dapresent absolve Silvio Derungs la scola mercantila. Suenter in onn d'introduziun a Basilea eis el uss engaschad ella regiun. Il mument absolve el in praticum tier la Vita Surselva a Glion. Cheu ei siu plaz da lavur vegnius adattaus aschia ch'el sa ademplir pli u meins tuttas lavurs dalla branscha commerciala. Silvio Derungs lavura numnadamein cun in computer che tschontscha cun el. Mintga bustab e mintga plaid ch'el formulescha rispunda il computer. La scola mercantila absolve el a Glion. Dapresent sesanfla el el tierz e davos onn. Il praticum tier l'assicuranza da malsaus cuoza entochen la fin d'avrel e lu digl uost entochen il december.

## Ina nova experienscha

Ferton che Silvio Derungs fa novas experienschas senza vesida engascha l'assicuranza da malsaus Vita Surselva a Glion per l'emprema ga ina persuna tschocca. «Nus savevan buca s'imaginar co quei seigi. Oz stuein nus conceder che nus essan per ina fetg interessanta experienscha pli rehs. En mintga cass essan nus mai s'enriclai da haver fatg quei pass. Sco assicuranza da malsaus havein nus in'veina sociala che animescha secapescha ad ina tala cooperaziun. Ultra da quei ei Silvio Derungs da nossa regiun», di il menader Roland Vincenz. Las adattaziuns tecnicas ein vegnidas finanziadas dall'assicuranza d'invaliditad. «Silvio Derungs lavura fetg speditiv. Dil tempo enneu, mo era dalla qualitat, eis el equals allas autras persunas. El ei buc in che fa nuot, sch'el ha buca lavur lu s'interesscha el per ina nova. Nus savein en

sesez mo cussegliar el. Deplorablamein havein nus il mument negina piazza vacanta, cass cuntrari savessen nus s'imaginar fetg bein d'occupar el», di il menader dalla cassa. Roland Vincenz ei surstaus dall'iniziativa da Silvio Derungs: «Jeu smarvegliel co el ha priu sia veta enta maun e cun tgei energia ch'el lavura. Da cumpassiun cun sesez ei da sentir insumma nuot.»

## Pregiudezis domineschan

Ch'igl ei tonaton buc aschi sempel d'anflar ina piazza per persunas impedidas conceda Daniela Seiler. La menadra dalla regiun dalla Surselva da Procap Grischun constatescha che biaras fatschentas han in pregiudezi arisguard igl engaschament da persunas cun impediments: «Biars manegian semplamein ch'ei mondi buca d'engaschar ina persuna cun in handicap. El cass da Silvio Derungs vesin nus claramein ch'igl ei pusseivel d'integrar ina persuna impedida – en quei cass in tschiec – en nos menaschis professiunals.» Ella Bassa seigi quei tut empau pli sempel: «D'ina vart ei il diember d'impedi leu bia pli gronds, dall'autra vart ein era las interpresas d'ina altra dimensiun e cheutras prontas d'acceptar era ina ni l'autra persuna impedida el menaschi. Plinavon ein las experienschas fatgas cun quellas persunas era bia pli grondas.» A Silvio Derungs plai la lavur mercantila fetg bein. Quei ha era da far empauet cun l'introduziun en sia nova activitad professiunala. Quella ei numnadamein succedida a moda precauta e detagliada: «Jeu hael era in computer a casa e saiel aschia exercitar era leu.» Luvrar da casa anora per exempel per la cassa da malsaus ei per motivs dalla protecziun da datas denton buca pusseivel.

## Surselva Memes – humor romontsch

Ivo Orlik alias Giganto derasa memes romontschs via facebook

DA SUSI ROTHMUND / ANR

■ El web engles s'audan memes – maletgs ni era fotografias cun in text divertent – gia varga in decenni tiel mintgadi ed era tier nus ein ils memes tudestgs bein enconuschents. Dapi ils 28 da mars vegn quella sort speciala da humor egl internet era derasada per romontsch. Surselva Memes ei ina pagina sin facebook ch'ei vegnida lantschada avon biebeen diesch dis dad Ivo Orlik ch'ei era enconuschents sco Giganto, il giuven rapper romontsch. Ils maletgs ni las fotografias cun texts divertents consume-schan probablamein tuts che drovan il web, tgi pli bia e tgi pli pauc. Ils memes ein en moda ed il humor magari sarca-

stics, senza remischun e bravamein perfids fan rir e surrir. Fotografias ni maletgs da caussas, animals e persunas, mo era texts da canzuns ni scenettas da films ed auter vegn mess en in auter context, aschia ch'ei tucca, peztga e fa rir. Quasi tut sa daventar in meme; ina fotografia d'in politicher ord las novitads alla televisiun, in video da carins gattels, ina reclama e bia auter. Pil solit setracta ei d'enzatgei ch'ins po far legher surlunder ni da caussas ch'ins sa duvrar per far legher sur d'enzatg(e) auter (mira exempels).

## Regalar humor plai

L'idea d'Ivo Orlik da realisar ina pagina che derasa sgnoccas, pia memes romontschs, para d'haver success. Entei-


fer 36 uras han numnadamein gia 500 persunas visitau Surselva Memes e smacau «plai a mi». Ussa ha la pagina prest 900 fans ed ils memes romontschs sederasan sco il fiug. Ivo Orlik ha era tradiu cu el ha giu l'idea da realisar quella pagina: «Duront fimar medischna hai jeu mirau memes tudestgs ed immediat stuii far il medem per romontsch.» Il giuven rapper ei dall'idea che mintga carstgaun disponi d'in cert humor che fetschi rir sur da caussas che seigien atgnamein gnanc propi legtras. Aschia ein era ils memes savens mo situaziuns dil mintgadi, enconuschentas a tuts e cungidas cun empau humor ner daventan ellas legtras. Il contemplader po sevirer ella situaziun e senta quasi tgei ch'il maletg munta. Che la pagina hu-

moristica romontscha ha survegniu varga 800 fans en aschi cuort temps fa plasher al giuven Sursilvan: «Jeu ditgel adina, carezia e humor ein las caussas ch'ins sa regalar il pli spert ad enzatg!» Sias sgnoccas vul el parter cun tuts interessai ed igl ei era lubiu da contribuir memes. Quels ein da tarmitter ad Ivo Orlik che selecziunescha allura ils maletgs e decida sch'ei vegnan silla pagina da Surselva Memes ni buc. Lubiu ei tut quei che fa rir, ei sto semplamein esser capeivel per la massa, sch'ei plai lu a mi, vegn ei silla pagina», declara el.

## Persunas enconuschentas

Actualme inflan ils visitaders da Surselva Memes mo fatschas da prominents ni dil tuttafatg nunenconuschents. Tut-

tina tracta il creader dalla satira temas regionalis che tucan. «Damai che jeu tematiseschel caussas dil contuorn eis ei clar ch'enzatgi sesenta empau tucan, quei ei denton aschia in humor che perfin ils pertuccai pon rir surlunder», manegia Ivo Orlik. Ils memes duegien divertir ed hagen negin auter senn. El futur vegni el probablamein era a metter dapli memes cun fatschas da persunas romontschas silla pagina. Entginas surpresas ha Ivo Orlik gia semtgau cun registraziuns ch'el ha fatg en Surselva e talas sequenzas da film vul el publicar via Surselva Memes. Sia pagina vul el denton era nezegiar sco canal da publicitad per siu niev album che cumpari la fin dalla stad. Ina buna idea dil rapper romontsch – Giganto.



Enzacons exempels da Surselva Memes.

FOTOS MAD